



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Díli
Dezembu 2022

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Díli

1. Totál kazu ne'ebé JSMP monitoriza: 17

Artigu	Tipu kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	6
Artigu 258 KP	Danu simples	1
Artigu 259 KP	Danu agravadu	1
Artigu 172 KP	Violasaun seksuál	2
Artigu 197 KP	Violasaun seksuál ba ema ne'ebé labele reziste	1
Artigu 145 KP	Ofensa ba integridade fízika simples	2
Artigu 261 KP	Uzurpasaun ba imóvel no falsifikasaun ba dokumentus ka notasaun tékniku	1
Artigu 299&297 KP	Ofensa ba integridade fizika simples ho arma brankas	1
Artigu 207 no 209 KP	Kondusaun sein karta no kondisaun perigu	1
Artigu 185, 139 b, 23 KP no artigu 21 Lei nú 5/2017	Tentative omisídiu, arma brankas no violasaun domisíliu	1
Totál		17

2. Totál desizaun ne'ebé JSMP monitoriza: 15

Tipu desizaun	Númeru
Suspensaun ba prizaun nia ezekeusaun (Artigu 68 KP)	3
Omologasaun (artigu 71)	2
Multa (artigu 67)	4
Absolve	1
Suspensaun ba pena prizaun nia ezekeusaun – artigu 68 ho regra konduta – artigu 70(g)	1
Admoestasaun (artigu 82)	1
Ofensa ba integridade física simples Natureza Violénsia Doméstika	3
Totál	15

3. Totál kazu sira ne'ebé adia tuir JSMP monitorizasaun: 0

4. Totál kazu sira ne'ebé kontinua prosesu tuir JSMP nia monitorizasaun: 5

B. Deskrisaun sumáriu julgamentu ba desizaun kazu sira

1. Krime danu simples

Nú. Prosesu : 0192/21.PNSIC
 Kompozisaun Tribunál : Singulár
 Juis : Dr. José Goncalves
 Prokuradór : Dr. Hipolito Santa
 Defeza : Dr. José Guterres
 Desizaun : Omologa pedidu dezisténsia keixa

Iha 01 Dezembru 2022, Tribunál Distritál Díli prezide julgamentu tentativa konsiliausaun ba krime danu simples ne'ebé envolve arguidu Zil Menezes Ximenes hasoru lezadu Dionisio Martins Sarmiento iha Munisípiu Díli.

Akuzasaun Prokuradór

Prokuradór akuza katak iha 17 Agostu 2021 iha oras tuku 20:00 kalan arguidu ho nia kareta tuir lezadu ho arguidu nia feen iha kareta ida to'o iha lampu merah Kaikoli-loja Vaganza nian oin arguidu tun husi ninia kareta hodi tenta loke odamatan kareta lezadu nian maibé xave hela nune'e arguidu uza liman tuku ba kareta nia odamatan hodi rezulta odamatan kareta oin kabetok.

Prokuradór akuza arguidu kontra artigu 258 KP kona-ba danu simples ho nia moldura penál to'o tinan 3 ka multa.

Produsaun ba provas

Iha prosesu julgamentu arguidu deklara katak nia tuku duni ba kareta oin maibé la maka'as no arguidu mós la hatene kona-ba kareta nia kabetok ne'e. Arguidu mós deklara katak nia halo aktu ne'e ho motivu tanba lezadu tula hela arguidu nia feen iha kareta laran.

Bazeia ba artigu 262 KPP tribunál halo tentativa konsiliaun ba krime sira ho natureza semi públizu. Iha prosesu tentativa konsiliaun ne'e lezadu hakarak deziste ninia keixahasoru arguidu no arguidu mós konkorda ho dezitensia ne'e.

Alegasaun finál

Prokuradór ho defeza haktuir katak lezadu ho vontade hakarak deziste ninia keixa hasoru arguidu no arguidu mós konkorda nune'e husu ba tribunál atu omologa prosesu ne'e.

Desizaun

Bazeia ba pedidu dezistensia keixa husi lezadu no arguiru mós konkorda nune'e tribunál konklui prosesu hodi omologa prosesu ne'e no absolve arguidu.

2. Krime ofensa ba integridade fízika simples ho natureza violénsia doméstika

Nú. Prosesu	: 0588/21.DICMR
Kompozisaun Tribunál	: Singulár
Juis	: Dr. Alvaro M. Freitas
Prokuradór	: Dr. Napoleão Soares
Defeza	: Dr. Agostinha Oliveira
Desizaun	: Pena prizaun tinan 2 suspende ba tinan 3 no aprezensa periódika durante fulan 6

Iha 01 Dezembru 2022, Tribunál Distritál Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JSB hasoru nia feen iha Munisípiu Díli.

Akuzasaun Prokuradór

Prokuradór akuza katak iha 09 Novembru 2021 iha oras tuku 08:30 dadeer iha Bairro-Pite, arguidu tuku maka'as dala ida iha lezada nia matan fukun halo lezada monu kedas ba rai no tebe dala ida iha lezada nia kanuruk, lezada hetan moras maka'as, kanek bubu metan no raan sai barak no suku pontu tolu iha matan fukun, lezada mos halo tratamentu iha Pradet.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu konfesa ba faktu sira iha akuzasaun ho razaun tanba lezada tarata no tolok arguidu iha nia kolega sira nia oin.

Enkuantu lezada kontinua konfirma ba faktu sira iha akuzasaun no deklara katak momentu ne'ebá lezada hirus tanba arguidu hemu tua no la serbisu. Depois ne'e lezada ba uma no arguidu mós tuir ba uma no tuku kedas lezada nia matan fukun no tebe iha nia kanuruk, lezada mós deklara katak depoide akontesementu sira di'ak malu kedas maibé seidauk hela hamutuk.

Alegasaun finál

Prokuradór konsidera arguidu baku duni lezada no arguidu hatene katak nia hahalok ne'e kontra lei penál, nune'e husu ba tribunál atu kondena arguidu ho pena prizaun fulan 3 suspende ba tinan 1.

Entretantu parte defeza husu ba tribuná atu aplika pena ne'ebé kmaan ba arguidu tanba arguidu konfesa integrameante, sira di'ak malu ona no arepende nia hahalok.

Desizaun

Depoisde avalia faktu sira hotu tribunál konsidera faktu sira provadu hotu bazeia ba arguidu nia konfiksaun no konfirma husi lezada no tetu mos sirkunstánsia atenuante sira hanesan depoisde akontesementu sira di'ak malu kedas, arrende nia hahalok no foin primeiravéz mai hatan iha tribunál nune'e tribunál konklui prosesu ne'e no kondena arguidu ho pena prizaun tinan rua suspende ba tinan tolu no aprezensa periódika durante fulan neen.

3. Krime ofensa ba integridade fízika simples ho natureza violénsia doméstika

Nú. Prosesu	: 0018/22.ALSIC
Kompozisaun Tribunál	: Singulár
Juis	: Dr. Ivan Patrocinio Antonino Goncalves
Prokuradór	: Dr. Luis Hernani Rangel
Defeza	: Dr. Marçal Mascarinhas
Desizaun	: Pena multa US\$60.00

Iha 02 Dezembru 2022, Tribunál Distritál Díli prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu Amandio Soares hasoru nia feen iha Munisípiu Aileu.

Akuzasaun Prokuradór

Prokuradór akuza katak iha 14 Juñu 2022, iha oras 11:00 iha Aileu, momentu ne'eba arguidu basa dala rua makaas iha lezada nia hasan parte loos no parte karuk rezulta moras, arguidu mós kaer katana hodi ameasa lezada sente tauk hodi ba hato'o keixa iha polisia. Antes ne'e lezada impresta osan iha NGO Moris Rasik, ho montante US\$300,00 USD, maibé la fó hatene ba arguidu hanesan lezada nia la'en.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu konfesa integralmente ba faktu sira iha akuzasaun no deklara katak lezada impresta osan iha NGO Moris Rasik ho montante US\$300,00, la fó hatene ba arguidu hanesan nia la'en, nune'e arguidu halo agresaun refere hasoru lezada.

Tribunál decide hodi presinde lezada tanba arguidu konfesa integralmente ba faktu sira iha akuzasaun.

Alegasaun finál

Prokuradór haktuir katak arguidu konfesa integralmente ba faktu sira hotu iha akuzasaun nune'e prokuradór konsidera faktu provadu no husu ba tribunál atu aplika pena multa ba arguidu.

Aleinde ne'e, defeza konkorda ho alegasaun prokuradór nian hodi kondena arguidu ho pena multa tuir arguidu nia kapasidade ho konsiderasaun arguidu konfesa integralmente ba faktu sira no arguidu mak responsabilidade ekonomia ba nia família.

Desizaun

Depoisde avalia faktu sira hotu, tribunál prova katak arguidu basa dala rua ho maka'as iha lezada nia hasan parte loos no parte karuk rezulta moras, nune'e tribunál konklui prosesu ne'e no kondena arguidu ho pena multa US\$60.00, ne'ebé kada loron sei selu 0.50 sentavus durante loron 120. Tribunál mós fiksa pena alternativa durante loron 80 prizaun kuandu arguidu la selu multa refere.

4. Krime Ofensa Integridade Fízika Simples

Nú. Prosesu	: 0640/21.DICMR FK
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Luís Hernani Rangel da Cruz
Defeza	: Dr. Sebastião Amado Batista
Desizaun	: Pena admoestasaun

Iha 05 Dezembru 2022 Tribunál Distritál Díli preside julgamentu leitura sentensa ba krime ofensa ba integridade fisika simples ne'ebé envolve arguidu Jemy Peterson da Cruz hasoru lezadu Pedro da Cruz iha Munisípiu Díli.

Akuzasaun Prokuradór

Prokuradór akuza katak iha 20 Dezembru 2021 iha oras tuku 21:00 kalan iha Comoro, arguidu tebe dala ida iha lezadu nia kotuk laran kauza moras. Antes ne'e lezadu tolok arguidu nia inan-aman maka halo arguidu nervozu no halo agresaun hasoru lezadu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba Provas

Iha julgamentu arguidu konfesa integralmente ba faktu sira iha akuzasaun no deklara katak iha momentu akontesementu arguidu ho kondisaun lanu no lezadu tolok arguidu mak arguidu halo agresaun hasoru lezadu hanesan arguidu nia aman, arguidu arrepende nia hahalok, depoisde akontesementu arguidu ho lezadu di'ak malu fali no foin primeiravés mai hatan iha tribunál, arguidu husu deskulpa ba lezadu no lezadu mós perdua ona arguidu.

Alegasaun finál

Prokuradór husu ba tribunál atu aplika pena admoestasaun ba arguidu tanba iha momentu akontesementu arguidu ho kondisaun lanu, arguidu hanesan estudante, hetan ona perdua husi lezadu hanesan nia aman no foin primeiravés mai hatan tribunál.

Aleinde ne'e, defeza mós konkorda ho alegasaun prokuradór nian hodi kondena arguidu ho pena admoestasaun tanba arguidu ho lezadu iha relasaun hanesan aman ho oan nomós lezadu perdua ona arguidu.

Desizaun

Depoisde avalia faktu hotu no tetu mós ho sirkunstánsia atenuante sira hanesan arguidu konfesa integralmente ba faktu sira, di'ak malu ona no arguidu foin primeiravés mai hatan iha tribunál nune'e tribunál konklui prosesu ne'e no kondena arguidu ho pena admoestasaun.

5. Krime violasaun seksuál

Nú. Prosesu	: 0044/ 16 LIBZT
Kompozisaun Tribunál	: Koletivu
Juis	: Dr. Ivan Patrocínio, Dra. Ana Paula Fonseca Dr. João Ribeiro
Prokuradór	: Dr. Osorio de Deus
Defeza	: Dr. Marcelino Colo
Desizaun	: Absolve

Iha 6 Dezembru 2022, Tribunál Distritál Díli prezide julgamentu leitura akordaun ba krime violasaun seksuál ne'ebé envolve arguidu JMdS no RSdS hasoru lezada JBAP iha Munisípiu Likisá.

Akuzasaun Prokuradór

Prokuradór akuza katak iha 02 Maiu 2016, iha oras tuku 20:00 kalan, lezada la'o ain husi Loidahar atu ba Maumeta-Likisá, bainhira to'o iha dalan klaran hasoru arguidu JMdS, halai korta lezada ba mai iha estrada no ikus mai kaer iha lezada nia liman, tanba ne'e lezada husu ba arguidu dehan *"izu nusá?"* maibé arguidu kaer metin nafatin lezada nia liman rua no lezada rejeita, maibé arguidu ameasa lezada dehan *"ó mai lai, ó lakohi, ha'u baku mate ó"*, tanba rai mós kalan ona, nune'e lezada mós tauk hodi halo tuir de'it arguidu JMdS ninia hakarak.

Iha momentu ne'e arguidu JMdS, lori lezada ba iha uma ida besik mota ninin, iha uma laran arguidu komesa kolu lezada nia kalsa no faru to'o lezada isin molik, hafoin haruka lezada toba iha rai. Arguidu JMdS mós kolu ninia kalsa no halo relasaun seksuál hasoru lezada maibé tanba lezada ninia orgaun seksuál klood (sei virgen), nune'e arguidu hasai fali ninia orgaun seksuál no hateten ba lezada katak *"ó nia orgaun seksuál klood liu, halo relasaun seksuál ladi'ak."*

Hafoin ida ne'e arguidu haruka lezada hatais fali ninia kalsa no faru, arguidu tula fali lezada ba iha estrada no haruka ninia kolega mak kontinua tula fali lezada ho motorizada marka *Revo* lori ba iha Mauboke, iha momentu ne'e arguidu nia kolega mós husu ba lezada atu halo relasaun seksuál, maibé lezada lakohi, tanba ne'e mak hatun de'it lezada iha dalan, husi fatin ne'ebá, lezada la'o ain de'it to'o iha dalan klaran hasoru fali arguidu RSdS ho ninia kolega nain rua seluk (lezada lahatene ema nain rua ne'e nia naran) lori tan fali lezada ba iha tasi ibun,

iha tasi ibun, arguidu RSdS ho nia kolega nain rua ne'ebé maka lezada lahatene nia naran, kolu lezada nia kalsa no hatoba lezada iha rai-henek leten foin sira nain rua halo relasaun seksuál ho lezada to'o lezada nia orgaun seksuál naklees raan sai barak, halo lezada senti moras no iha momentu ne'e arguidu RSdS uza kondom maka halo relasaun seksuál ho lezada.

Arguidu sira ninia hahalok ne'e rezulta raan sai maka'as no senti moras iha lezada ninia oragaun seksuál. Hafoin halo tiha relasaun seksuál ho lezada, arguidu RSdS ninia kolega nain rua ne'e fila ba sira nia uma, no arguidu RSdS mak tula fali lezada ba iha ninia uma, to'o iha arguidu RSdS nia uma, arguidu sei ameasa no halo tauk lezada hodi halo tan relasaun seksuál ho lezada dala haat no iha momentu ne'e arguidu RSdS foti tiha lezada ninia jaket no to'o agora jaket ne'e sei iha arguidu nia liman. Kauza husi arguidu sira ninia asaun sira ne'e hotu durante loron haat, lezada toba de'it iha uma tanba moras no la'o la di'ak, nune'e médiku sira husi Pradet mak ba tula lezada lori ba ospital hodi halo tratamentu.

Konsekuénsia direita no nesesariamente husi arguidu JMdS no RSdS ninia konduta sira temi ona iha leten halo lezada ninia orgaun seksuál naklees, raan sai barak, senti moras maka'as to'o la'o mós la di'ak.

Prokuradór akuza arguidu nain rua kontra artigu 172 KP kona-ba violasaun seksuál ho moldura penál tinan 5 to'o tinan 15 prizaun.

Produsaun ba prova sira

Iha prosesu julgamentu arguidu JMdS deklara katak faktu sira ne'ebé akuza ba arguidu balun loos no balun laloos, faktu sira loos maka arguidu hasoru duni lezada no hanoin atu ajuda lezada, tanba lezada moras mental la'o tun sa'e no la'o iha Merkadu, la'o ba mai hakilar tun sa'e arguidu hetan iha estrada iha parte Maumeta nian, lezada la'o hela no arguidu husu ba lezada "*nusá ó la'o hanesan ne'e*", arguidu hela iha Maumeta no lezada hela iha Loidahar, arguidu kuñese lezada tanba arguidu kolega ho lezada nia maun, depoisde arguidu husu tiha lezada, motór ida mai arguidu hapara motór dehan ajuda lai lezada lori ba nia uma.

Arguidu deklara liután katak faktu ne'ebé akuza katak arguidu halo relasaun seksuál ho lezada ne'e laloos hotu, arguidu laiha problema ho lezada, arguidu kolega ho lezada nia maun nomós arguidu dehan katak sira iha uma laran moras mental hotu, lezada nia maun no lezada moras mental. Arguidu lahatene tanba sá mak lezada bele dun hanesan ne'e ba arguidu, arguidu mós hakfodak bainhira hetan karta notifikasaun husi prokuradór.

Enkuantu arguidu RSdS nega faktu sira no deklarata katak, nia la kuñese lezada nomós kolega ida tula lezada ne'e, arguidu deklarata katak la'os nia, arguidu JMdS hapara ho hodi tula lezada ho motór ne'e, arguidu dehan nia mós lahatene kona-ba akontesimentu ne'e nomós kazu ne'e.

Aleinde ne'e lezada deklarata katak nia kuñese arguidu JMdS tanba arguidu kolega di'ak ho lezada nia maun no lezada mós deklarata katak arguidu RSdS la'os arguidu ne'ebé halo relasaun seksuál ho lezada. Lezada deklarata liután katak nia kuñese arguidu JMdS maibé la kuñese arguidu RSdS, lezada mós dehan katak la'os arguidu nain rua ne'e mak halo relasaun seksuál ho lezada, lezada kuñese de'it mak arguidu JMdS maibé arguidu RSdS la'os arguidu ne'ebé halo relasaun seksuál hasoru lezada, maibé ema seluk mak halo relasaun seksuál hasoru lezada.

Lezada mós deklarata katak antes ne'e lezada ho nia família sofre moras mental no lezada sempre konsumu ai-moruk durante fulan tol-tolu no agora lezada rekopera ona husi moras mental.

Alegasaun final

Prokuradór haktuir katak bazeia ba deklarasaun lezada nian prokuradór konsidera arguidu sira la provadu komete violasaun seksuál hasoru lezada. Prokuradór deklarata liután katak kona-ba faktu sira iha duni no krime akontese duni, maibé ema seluk mak komete la'os arguidu nain rua mak halo relasaun seksuál hasoru lezada no lezada mós la kuñese arguidu sira, , nune'e husu ba tribunál atu absolve arguidu sira husi prosesu ne'e.

Alende ne'e defeza haktuir katak la'os arguidu sira mak halo relasaun seksuál hasoru lezada no lezada rasik mós deklarata katak la'os arguidu nain rua mak halo relasaun seksuál hasoru lezada nune'e defeza konkorda ho alegasaun prokuradór nian atu absolve arguidu sira husi prosesu ne'e.

Desizaun

Depoizde avalia faktu sira hotu, tribunál konsidera arguidu nian rua la provadu komete krime violasaun seksuál hasoru lezada bazeia ba lezada nia deklarasaun nune'e tribuná konklui prosesu ne'e no absolve arguidu sira husi krime ne'e.

6. Krime violasaun seksuál

Nú. Prosesu	: 0300/21.DIBCR
Kompozisaun Tribunál	: Koletivu
Juis	: Dr. Ana Paula Fonseca, Dr Ivan Patrocínio no Dr João Ribeiro
Prokuradór	: Dr. Joao Marques
Defeza	: Dr. Agostinha Oliveira
Desizaun	: Pena tinan 3 suspende ba tinan 4

Iha 06 Dezembru 2022, Tribunál Distritál Díli prezide julgamentu leitura akordaun ba krime

violasaun seksuál ne'ebé envolve arguidu Jose D. Amaral hasoru lezada MSdC iha Munisípiu Díli.

Akuzasaun Prokuradór

Prokuradór akuza katak iha 25 Dezembru 2021 iha oras tuku 00:00 kalan, arguidu ba lezada nia uma atu aprende liafuan di'ak (bíblia sagrada) ho lezada nia inan-aman sira, to'o kalan arguidu seidak fila ba nia uma no lezada matan dukur ona, nune'e lezada ba dada sai nia kulsaun husi kuartu mai tau iha sala vizita atu toba, iha kalan boot bainhira arguidu haree lezada toba dukur, arguidu hakbesik ba lezada no toba iha lezada nia sorin lamas lezada nia kotuk laran toba besik lezada hodi kose nia kalsa oin ba lezada nia orgaun sensitivu (anus).

Prokuradór akuza arguidu kontra artigu 177 KP kona-ba violasaun ho moldura penál tinan 5 to'o tinan 15 prizaun.

Produsaun ba prova sira

Iha prosesu julgamentu, arguidu deklara katak nia toba duni iha lezada nia sorin, arguidu lamas lezada nia faru kotuk ho kondisaun dukur hela no toba lahatene-an no arguidu deklara katak antes ne'e nia toba bei-beik ona iha lezada nia uma tanba iha relasaun família.

Aleinde ne'e, lezada mós konfima katak, lezada koñese arguidu tanba konsidera hanesan família (la'osfamília besik), lezada deklara katak iha momentu ne'ebá lezada toba duni iha sala vizita no bainhira lezada toba dukur tiha, arguidu mós ba toba tan iha lezada nia sorin hodi arguidu lamas lezada nia faru kotuk no kose nia kalsa oin ba iha lezada nia anus no lezada sente kulsaun nakdoko mak halo lezada hakfodak hodi hadeer mai tanis fó hatene ba nia inan-aman.

Alegasaun finál

Prokuradór haktuir katak arguidu provadu komete duni krime hasoru lezada, maske arguidu nega faktu hotu maibé lezada konfirma ho akuzasaun sira antes no deklara katak depois akontesementu sira di'ak malu fali, maske nune'e husu ba tribunál atu kondena arguidu ho pena prizaun fulan neen suspende ba tinan ida.

Entretanru parte defeza husu ba tribunál atu fó justisa ba arguidu ho konsiderasaun depoisde akontesementu sira di'ak malu kedas no arguidu mós arrepende ninia hahalok sira.

Desizaun

Depoisde avalia faktu sira hotu, tribunál prova arguidu komete duni krime hasoru lezada, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan haat.

7. Krime violasaun seksuál

Nú. Prosesu : 0090/14 PDDIL

Kompozisaun tribunál : Koletivu
Juis : Dr. Jose Gonsalves, Dr. Alvaro M. Freitas no Dr. Argentino L. Nunes
Prokurador : Dr. Simão Brites
Defeza : Dr. Marçal Mascarinhas
Desiaun : Absolve arguidu sira husi krime ne'e

Iha 6 Dezembru 2022, Tribunál Distritál Díli prezide julgamentu leitura sentensa ba krime violasaun seksuál ne'ebé envolve arguidu HM, BM no AS hasoru lezada AdC iha Munispiu Ermera.

Akuzasaun Prokuradór

Prokuradór akuza arguidu sira katak iha 06 Jullu 2013, iha oras tuku 14:00 lokraik, lezada fila husi bazar Dempo atu ba nia uma, iha dalan klaran lezada hetan arguidu nain tolu no iha altura ne'ebá laiha ona ema seluk la'o iha dalan refere, arguidu nain tolu la'o husi lezada nia kotuk haleu lezada no hakuak lisuk lezada no arguidu HM kolu sai hotu lezada nia rupa inklui rupa laran, arguidu HM latan lezada ba iha rai no halo relasaun seksuál hasoru lezada to'o ejakula, arguidu nain rua seluk mós troka malu halo lisuk relasaun seksuál ho lezada to'o ejakula, altura akontese violasaun ne'e lezada hakilar maibé laiha ema ida mak rona tanba iha fatin refere laiha ema seluk. Hafoin halo relasaun seksuál, arguidu sira mós na'ok lezada nia osan hamutuk US\$. 50.00.

Prokuradór akuza kontra krime violasaun seksuál tuir artigu 172 KP ho moldura penál tinan 5 to'o tinan 15 Prizaun.

Produsaun ba prova sira

Iha julgamentu arguidu sira nega hotu faktu sira iha akuzasaun no deklarata katak iha altura ne'e sira fila husi bazar Dempo fatubesi nian atu fila ba sira nia uma mak to'o iha mota kafé laran, lezada toman arguidu sira no arguidu sira tuur deskansa hela iha mota laran mak lezada husu ba arguidu sira atu halo relasaun seksuál maibé arguidu sira mak lakohi tanba sira sei iha relsaun família.

Alende ne'e lezada deklarata katak iha altura ne'e arguidu sira la halo relsaun seksuál ho lezada maibé tanba lezada diskunfia arguidu sira mak foti lezada nia osan US\$50.00 nune'e lezada nerbozu ba keixa arguidu sira, lezada mós deklarata katak iha akuzasaun lezada la dehan kona-ba violasaun ne'e maibé nia so dehan de'it arguidu sira foti lezada nia osan US\$50.00, lezada mós deklarata katak tuir relatóriu médiku ne'ebé hatete lezada nia orgaun seksuál iha sinál mean ne'e lezada la hatene no laiha koñesmentu.

Alegasaun Finál

Prokuradór konsidera faktu sira iha akuzasaun la provadu nune'e prokuradór husu ba tribunál atu absolve arguidu sira husi krime ne'e.

Alende ne'e defeza konkorda ho alegasaun prokuradór nian tanba arguidu sira la provadu komete krime violasaun seksuál hasoru lezada.

Desizaun

Depois avalia faktu sira hotu, tribunál la prova arguidu sira prátika krime violasaun seksuál hasoru lezada. Arguidu sira deklara katak sira la halo relasaun seksuál, lezada duun arguidu sira dehan arguidu sira mak viola lezada troka malu ne'e la loos, lezada duun deit tanba iha altura sira fila husi bazar hasoru malu iha dalan lezada nia osan US\$50.00 iha kartera laran lakon no lezada deskonfia arguidu sira mak foti nune'e lezada husu ba sira maibé arguidu sira dehan sira la hetan nune'e lezada duun deit arguidu sira iha polísia dehan arguidu sira mak viola lezada troka malu.

Prova sira ne'e produs bazeia ba arguidu sira nia deklarasaun no konfirma husi lezada. Bazeia ba faktu la provadu sira ne'e, tribunál konklui prosesu ne'e hodi absolve arguidu sira husi krime ne'e.

8. Krime ofensas ba integridade fízika simples no Krime Arma Brankas

Nú. Prossesu	: 0020/21.LIMBR
Kompozisaun Tribunál	: Koletivu
Juís	: Dr. Ivan Patrocínio Antonino, Dra. Ana Paula, Dr. Argentino L. Nunes
Prokuradór	: Dr. Luís Hernani Rangel da Cruz
Defeza	: Dr. Manuel Tilman
Desizaun	: Pena prizaun tinan tolu suspende ba tinan haat

Iha 06 Dezembru 2022 Tribunál Distritál Díli preside julgamentu leitura akoradun ba krime ofensas ba integridade fizika simples no krime arma brankas ne'ebé envolve arguidu AdSP hasoru lezadu J iha Munisípiu likisá.

Akuzasaun Prokuradór

Prokuradór akuza katak iha 21 Abril 2021 iha oras tuku 21:40 kalan, iha Maubara likisá lezadu ho nia aman ki'ik tuur hela iha uma, derrepenti rona ema hakilar iha nia aman nia uma, no sira nain rua mós halai ba haree. Bainhira lezadu to'o iha fatin ne'e nia haree arguidu ka'er hela meza tuda ba nia aman maibé la kona, nune'e mak lezadu mós ko'alia ba arguidu katak '*Maun labele halo hanesan ne'e ba ita nia aman*' hafoin arguidu halai ba kuartu laran hodi foti kedas tudik ida hodi sona kedas ba lezadu nia hirus matan parte loos kauza kanek no raan sai barak. Tanba arguidu ka'er nafatin tudik entaun lezadu halai kedan husi fatin akontesimentu hodi ba keixa iha polísia no ba halo mós tratamentu iha Postu Saúde Likisá. Antes ne'e lezadu ba hakalma arguidu ne'ebé diskuti malu hela ho nia aman, arguidu nerbozu no halo agresaun refere hasoru lezadu

Prokuradór akuza arguidu kontra argitu 145 KP kona-ba ofensas ba integridade fizika simples no artigu 2 nú 2 alinea (g), artigu 20 lei nú. 5/2017, iha konkursu ba krime tuir artigu 35 KP.

Produsaun ba prova sira

Bazeia ba artigu 262 nú1 KPP kona-ba tentativa ba konsiliaun ba krime sira ne'ebé ho natureza semi públiku nune'e tribunál halo tentativa konsiliaun entre lezada ho arguidu. Iha prosesu tentativa konsiliaun ne'e lezadu hakarak deziste ninia keixa hasoru arguidu tanba arguidu ho lezadu nu'udar maun alin rasik.

iha julgamentu arguidu deklara katak faktu sira ne'ebé akuza arguidu ne'e balun loos no balun la loos. Arguidu nega katak altura ne'eba nia iha uma laran kaer tudik atu salva nian, tanba iha liur ema barak no lezada mak kaer karau dikur hodi baku ba didin loloon, arguidu mós tauk no halai sai ba liur atu salva-an, no arguidu halai sai ba liur nia alin lezadu mak hodi karau dikur baku uluk ba arguidu nia oin, tanbá ne'e mak arguidu sona kedan ba lezadu nia hirus matan. Arguidu laiha intensaun atu oho nia alin, arguidu deklara tan katak iha altura ne'ebá laiha objetu seluk ne'ebé mak iha atu defende an, so iha tudik modo ho naruk sentimu 20 mak iha kuartu laran ne'ebé arguidu uza hodi defende an.

Alegasaun finál

Prokuradór akuza arguidu ho krime arma brankas ne'ebé ho tudik sentimu 20, ho nia moldura penál tinan 3 to'o tinan 10, maibé arguidu ho lezadu dame malu antes ona ho nune'e husu ba tribunál atu kondena arguidu ho pena prizaun tinan tolu no suspende ba tinan tolu.

Enkuantu parte defeza mós konkorda ho prokuradór nia alegasaun atu aplika pena suspensaun ba arguidu tanba arguidu konfesa katak nia laiha intensaun atu oho lezadu maibé atu halo tauk de'it lezadu, arguidu iha ona feen no oan ida nomós foin primeiravés mai hatan iha tribunál.

Desizaun

Depois de avalia faktus hotu provadu nune'e tribunál konklui prosesu hodi kondena arguidu ho Pena prizaun tinan tolu suspende ba tinan haat.

9. Krime maus tratus ba kónjuje

Nú. Prosesu	: 0169/21 PDDIL
Kompozisaun tribunál	: Koletivu
Juis	: Dra. Alberitnha Neves, Dra. Edite palmira no Dr. Afonso
Carmono	
Prokuradór	: Dr. Simão Brites
Defeza	: Dr. Marçal Masçarinhas
Desizaun	: Absolve

Iha 13 Dezembru 2022, Tribunál Distritál Díli prezide julgamentu leitura sentesa ba krime maus-tratus ba kónjuje ne'ebé envolve arguidu Jaime do Rosario Baptista hasoru lezada Betinha Martins Faculto Guterres iha Munispiu Díli.

Akuzasaun prokuradór

Prokuradór akuza arguidu katak iha 16 Junu 2021, iha oras tuku 22:00 kalan, iha aldeia Akadiruhun, arguidu tuku dala tolu iha lezada nia kanotak parte loos no tuku dala ida iha

lezada nia liman sikun parte loos. Arguidu ninia hahalok ne'e rezulta moras makas iha lezada nia kanotak no liman sikun no halo lezada dada iis la di'ak. Antes ne'e lezada ba *Gym Zar* fila uma tarde, nune'e arguidu nerbosu halo agresaun refere hasoru lezada.

Tuir fali iha 5 Agostu 2021 iha tuku 10:30 iha Taibesi Lahane Osiental Díli, arguidu tuku dala rua iha lezada nia ulun rezulta bubu no moras iha lezada nia ulun. Antes ne'e arguidu deskonfia lezada amante ho mane seluk.

Prokuradór akuza arguidu kontra krime maustratus ba kónjuje tuir artigu 154 KP konjuga ho artigu 2, 3 (a) no 35 (a) LKVD.

Produsaun ba prova sira

Iha julgamentu ne'e arguidu uza nia direitu nonok no tanba lezada editál (notifika dala barak maibé la hetan lezada nia prezensa) nune'e tribunál kontinua ba alegasaun finál.

Alegasaun finál

Iha alegasaun finál prokuradór husu ba tribunál atu konsidera deklarsaun antes husi lezada iha prokurador maibé husu atu altera krime ne'e husi krime maus-tratus ba kónjuje ba fali krime ofensa ba integridade fizika simples tuir artigu 145 KP tanba prokuradór konsidera faktu sira iha akuzasaun kmaan hela nune'e prokuradór husu atu aplika pena prizaun fulan 3 ba kada krime no aplika pena únika fulan 5 no suspende ba tinan 1.

Entretantu defeza husu ba tribunál atu absolve arguidu husi krime ne'e karik la rona deklarasaun lezada nian iha autóridade judisiáriu nia oin, maibé karik lezada nia deklarsaun perante autoridade judisiáriu, defeza husu atu aplika pena ne'ebé kma'an. Defeza mos konkorda ho pedidu alterasaun husi prokuradór tanba krime ne'e ladun grave.

Desizaun.

Iha julgamentu tribunál la haree prova ruma atu avalia tanba arguidu uza nia direitu nonok no tribunál mós la rona lezada nia deklarasaun tanba tribunál la hetan nia paraderu (lezada editál).

Bazeia ba razaun sira ne'e tribunál dúvida no konklui prosesu ne'e hodi absolve arguidu husi krime ne'e.

10. Krime ofensa ba integridade fízika simples

Nú. Prossesu	: 0028/22.PDDIL
Kompozisaun Tribunál	: Singulár
Juís	: José Gonçalves
Prokuradór	: Dr. Hipolito Exposto Santa
Defeza	: Dr. Sebastião Amado
Desizaun	: Omologa pedidu dezisténsia keixa

Iha 20 Dezembru 2022, Tribunál Distritál Díli prezide julgamentu tentativa konsiliaun ba krime ofensa ba integridade fízika Simples ne'ebé envolve arguidu Carlos Mendonça

Nogueira, Flaviano Lemos no Teonito Mendonça Borges hasoru lezadu Rui Bere Tilman, Domingos Tilman ho Rogerio Xavier Tilman iha Munisípiu Aileu.

Akuzasaun Prokuradór

Prokuradór akuza katak iha 01 Janeiro 2022, iha oras tuku 16:00 lokraik, lezadu hamutuk ho arguidu sira halo preparasaun dada tenda hodi selebra natal hamutuk iha Bairro Iaran, derrepente labarik sira sunu fugete tarutu no lezadu hakfodak hodi tolok no arguidu ho naran Carlos MN mai ho motor mai tuku kedas dala barak iha lezadu nia oin.

Tuir mai arguidu FL hakat mai hodi tebe dala ida iha lezadu nia kabun no tuku dala barak iha lezadu nia oin.

Depoisde akontese problema ne'e lezadu Domingos Tilman ba konfirma ho arguidu kona-ba baku nia oan (mak sunu fugety), no arguidu sira komesa diskute malu ho lezadu nune'e arguidu Teonito tebe maka'as dala rua iha lezadu nia kanotak parte loos halo lezadu monu ba rai hodi rezulta kanek iha liman sikun parte karuk.

Tanba haree arguidu tebe lezadu Domingos Tilman nune'e lezadu Rogerio Tilman nu'udar oan halai ba hafahe, maibe arguidu kontinua tuku dala ida ho maka'as iha lezadu Domingos Tilman nia hasan parte loos hodi rezulta bubu.

Prokuradór akuza arguidu sira kontra artigu 145 KP kona-ba ofensas ba integridade fizika simples ho moldura penal to'o tinan 3 ka multa.

Produsaun ba prova sira

Tribunál bazeia ba artigu 262 KPP, tribunál halo tentativa konsiliaun ba kazu sira natureza semi públiku.

Alende ne'e Lezadu iha nia deklasaun hakarak desiste ninia keixa hasoru arguidu sira ho kondisaun iha futuru arguidu labele repete tán ninia hahalok. Aleinde ne'e, arguidu mós konkorda ho lezadu nia dezisténsia keixa no promete iha futuru sei la repete tán ninia hahalok hanesan hasoru lezadu.

Alegasaun Finál

Prokuradór ho defeza apresia ho akordu dame ne'ebé parte rua konkorda atu deziste ninia keixa nune'e husu ba tribunál atu omologa akordu dame no absolve arguidu husi krime.

Desizaun

Tribunál bazeia lezadu ninia dezisténsia no akordu dame ne'ebé parte rua konkorda nune'e, tribunál konklui prosesu ne'e hodi omologa akordu dame no absolve arguidu.

11. Krime omisídiu agravadu konjuga ho krime arma brankas no inséndiu

Nú. Proseus : 0011/22 ERERM

Konpozisaun tribunál : Koletivu

Juis : Dr. Argentino L. Nunes, Dr. Jose Gonsalves no Dr. Alvaro
Freitas
Prokuradór : Dr. Simão Brites Seixas
Defeza : Dr. Juvinal Yanes Freira
Desizaun : Kondena arguidu ho pena prizaun tinan 21

Iha 20 Dezembru 2022, Tribunál Distritál Díli prezide julgamentu leitura akordaun ba krime omisídiu agravadu konjuga ho arma brankas no inséndiu ne'ebé envole arguidu Julião Alves hasoru nia fen Juliana de Jesus Marçal ne'ebé akontese iha Munisípiu Ermera.

Akuzasaun prokuradór

Prokuradór akuza arguidu katak iha 15 Abril 2022 iha oras tuku 20:00 kalan lezada loke muzika dansa mesak-mesak nune'e arguidu hateten ba vítima katak *'ó dansa hanesan ó nia aman loloos'* nune'e lezada nervovu ba tuku arguidu nia hirus matan no sai husi uma no fila iha tuku 06:00 dadeer. Iha momentu ne'e lezada lori fatuk tuda sira nia uma dala barak nune'e, arguidu nerbozu lori katana sai husi uma laran ba taa kedas dala ida iha lezada nia kabaas parte loos, taa dala rua tutuir malu iha lezada nia kakorok rezulta ran sai barak husi lezada nia kakorok no kabaas, lezada monu tun ba rai no mate kedas iha fatin akontesementu. Hafoin arguidu dada lezada nia isin mate tama ba iha uma laran no sunu uma ho lezada hamutuk no rezulta lezada nia isin motuk hamutuk ho sasan sira iha uma laran.

Hafoin akontesementu Natalia Alves (arguidu ho lezada sira nia oan) husi Fatubesi ba iha fatin akontesementu ho objetivu atu hafahe nia inan-aman maibé kuandu Natalia to'o ba fatin akontesementu hetan sira nia uma toos motuk ona nune'e nia bolu nia inan-aman dehan *'apa, ama imi iha ne'ebé?'* arguidu sai husi uma seluk ne'ebé besik iha fatin refere no hatan nia oan dehan *'hau iha ne'e ó nia ama mak hau taa mate ona no sunu motuk tiha ho uma ne'e'* hafoin nia oan tanis no desmaia monu tuna ba rai no bainhira Natalia oin mos, nia hadeer mai la hetan nia aman maibé nia haree ema barak ba hobur ona fatin refere no iha tempu hanesan polísia mós to'o ona iha fatin refere.

Arguidu nia hahalok ne'e rezulta lezada lakon vida no ai-han iha uma toos refere ahi han motuk hamutuk ho lezada nia isin mate.

Arguidu nia hahalok ne'e prokuradór akuza arguidu kontra konkursu de krime tolu (3) Krime Omisídiu agravadu tuir artigu 139 (g) KP, artigu 263 nú. 1 kona-ba inséndiu, artigu 35 norma sira husi KP. Artigu 20 nú. 1 konjuga ho artigu 2 nú 1 alinea b, nú. 2 alinea f husi Lei nú. 5/2017 kona-ba arma brankas konjuga ho LKVD.

Produsaun ba prova sira

Iha prosesu julgamentu arguidu konfesa integralmenete ba faktu sira iha akuzasaun, arguidu deklara katak nia taa lezada tanba lezada lori fatuk tuda uma dala barak no bainhira nia ba taa lezada nia kabaas ne'e nia rasik lahatene-an ona no kontinua taa lezada nia kakorok no dada tama uma laran no sunu motuk tiha hamutuk ho uma toos refere, arguidu mós deklara katak lezada sofre moras no dala ruma kanta no dansa mesak-mesak.

Arguidu mós deklara katak uma ne'ebé nia sunu hamutuk ho lezada nia isin mate ne'e uma toos ne'ebé bain-bain sira halo toos hela iha uma refere, Arguidu deklara arrepende ba nia hahalok no sente triste tebes hafoin akontesmentu ne'e.

Iha deklarsaun testemuña Natalia Alves ba tribunál katak nia ho nia bin no alin sira hela hotu iha Fatubesi no nia inan-aman (lezada ho arguidu) mesak mak hela iha toos ho distansia maizumenus kilometru 3, testemuña la haree arguidu taa lezada maibé bainhira testemuña rona informsaun husi viziñu Marcolino katak maun Juliao oho ona ó nia inan, testemuña husi Fatubesi ba kedas iha fatin akontesementu refere ho objetivu atu salva netik lezada maibé kuandu testemuña to'o ba iha fatin refere, sira nia uma toos ahi han motuk ona nune'e testemuña bolu arguidu ho lezada dehan *apa, ama imi iha ne'ebé?* maibé arguidu sai husi uma toos seluk ne'ebé besik iha fatin akontesmentu refere no dehan ba testemuña Natalia katak *'hau iha ne'e, ó nia inan mak hau taa mate ona no sunu motuk tiha hamutuk ho uma ne'e'*, testemuña rona nia aman nia lia fuan ne'e nia tanis no oin nakukun monu-tun ba iha rai no bainhira testemuña matan mós fali ema barak ba hobur ona fatin refere no polisia sira mós too ona iha fatin ne'e.

Alegasaun finál

Iha alegasaun prokuradór prova katak arguidu provadu komete krime omisídiu agravadu hasoru nia fen no hafoin oho tiha nia fen, nia sunu motuk tan nia fen nia isin mate hamutuk ho aihan (batar) sira iha uma toos refere. Arguidu hatene no konsente katak taa ema ne'e bele halo ema kanek ka mate maibé nia hakarak halo no halo nia fen mate.

Bazeia faktu porvadu sira no tetu mós sirkunstansia hotu-hotu, prokuradór husu ba tribunál atu kondena arguidu ba krime omisídiu agravadu ho pena prizaun tinan 25, enkuantu ba krime arma brankas prokuradór husu atu kondena ho pena prizaun tinan 3 no ba krime insensia prokuradór husu tinan 5 prizaun. Husi pena sira ne'e, prokuradór husu pena únika prizaun tinan 26.

Entertantu defeza iha nia alegsaun husu ba tribunál atu tetu sirkunstansia hotu-hotu ne'ebé iha no fó pena ne'ebé adekuadu no justu.

Hafoin alegsaun, tribunál adia fali leitura akordaun ba iha 20 Dezembru 2022 iha tuku 17 lokraik.

Desizaun

Depois avalia faktu sira hotu, tribunál prova katak arguidu provadu lori katana sai husi uma laran ba taa kedas dala ida iha lezada nia kabaas parte loos, taa dala rua tutuir malu iha lezada nia kakorok hodi rezulta ran sai barak husi lezada nia kakorok no kabaas, lezada monu tun ba iha rai no mate iha fatin akontesementu. Provadu mós katak hafoin lezada mate, arguidu dada lezada nia isin mate tama ba iha uma toos sunu hotu uma refere nune'e rezulta lezada nia isin mate motuk hamutuk ho uma refere.

Provadu mós katak kazu ne'e akontese bainhira iha 15 Abril 2022, lezada loke muzika dansa mesak-mesak nune'e arguidu hatete ba lezada katak '*o dansa hanesan loos onia-aman*' nune'e lezada nervozu ba tuku arguidu no sai husi uma no fila iha tuku 06:00 dadeers ba tuda uma dala barak nune'e arguidu komete krime ne'e hasoru lezada.

Bazia ba faktu provadu sira iha leten no tetu mós sirkunstansia hotu-hotu ne'ebé iha, tribunál konklui hodi kondena arguidu ba krime omisídiu agravadu ho natureza Violénsia doméstika ho pena prizaun tinan 19 no kondena arguidu ba krime arma brankas ho pena prizaun tinan tolu no aplika pena únika tinan rua nulu prizaun ba arguidu.

Entertatu ba krime insendiu, tribunál absolve tanba lezada mate tiha ona mak arguidu dada tama ba uma refere hodi sunu no uma toos refere ho valór osan la to'o US\$5.000.

12. Krime ofensa ba integridade física simples ho natureza violénsia doméstika

Nú. Prosesu	: 0574/21.DICMR
Kompozisaun Tribunál	: Singulár
Juis	: Dr. Alvaro M. Freitas
Prokuradór	: Dr. Luis Hernani Rangel Da Cruz
Defeza	: Dr. Arlindo Sanches (Advogadu Privadu)
Desizaun	: Pena multa US\$120

Iha 22 Dezembru 2022, Tribunál Distritál Díli prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu Pedro N.C.DS. Brincel, hasoru nia feen iha Munisípiu Díli.

Akuzasaun Prokuradór

Prokuradór akuza katak iha 07 Novembru 2021 iha oras tuku 19:30 kalan, arguidu tama ba uma laran no ko'alia hasoru kedas arguidu (lezada deskonfia nia la'en) lezada hatete ba arguidu dehan *labele kaer hau nia oan tanba ó foer toba ho feto sira halo vida ne'e*, arguidu mós tolok hasoru kedas lezada dehanó *ko'alia hela de'it aban hau sai husi uma ne'e ho labarik ó labele tuir ami*, hafoin lezada kaer tudik hodi la'o ba arguidu no hatete ba arguidu dehan '*ó keta lori hau nia oan sai husi nee lae hau oho ó*', no arguidu foti kadeira ai-bebé nian hodi baku dala rua iha lezada nia liaman perte karuk, tuku lezada nia hasan resulta moras no halo ran sai husi nia ibun depois arguidu foti save kareta nian hodi sai kedas husi uma.

Iha 08 Novembru 2021, bainhira arguidu fila fali ba uma foti nia roupa atu sai husi uma, *lezada ko'alia ba arguidu ó atu ba ne'ebé, laiha justifikasaun no lezada fakar ai-manas ba arguidu* hafoin arguidu tuku, tebe dala barak iha lezda nia isin loloon hodi rezulta moras no halo oin nakukun.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Arguidu konfesa integralmente ba faktu sira hotu iha akuzasaun ho razaun tanba lezada trata arguidu no fakar aimanas ba arguidu nia isin loloon.

Enkuantu lezada kontinua konfirma ba faktu sira iha akuzasaun no deklarata katak momentu ne'ebá lezada deskonfia arguidu moris hamutuk ho fetu seluk.

Alegasaun finál

Prokuradór konsidera labele halo julgamentu ou faktu rua fila-fila tanba arguidu ho lezada keixa kontra keixa. Konkursu krime nafatin provadu tanba halo krime rua kastigu nafatin arguidu no aplika pena multa tuir arguidu nia nesesidades.

Entretantu parte defeza husu ba tribunál atu konsidera arguidu nia situasaun katak maske faktu sira ne'e loos, maibé ai-manas ne'ebé lezada uza hodi rega ba arguidu, dala ruma lezadaiha ona planu antes no arguidu defende nia an físikalmente arguidu ho emosional tuku, tebe lezada nune'e defeza entrega ba tribunál hodi bele decide.

Desizaun

Depoisde avalia faktu hotu, tribunál konsidera faktu sira provadu hotu bazeia ba arguidu nia konfiksaun no konfirmasuan husi lezada, nune'e tribunál konklui prosesu ne'e no kondena arguidu ho pena multa US\$120.00, ne'ebé kada lora arguidu sei selu US\$1.00 durante lora 120. Tribunál mós fiksa pena alternativa durante lora 80 prizaun,

13. Krime Ofensa ba Integridade Físika Simples ho natureza violénsia doméatika

Nú. Prosesu : 0257/21 DIBCR
Kompozisaun Tribunál : Singulár
Juis : Dr. Argentino Nunes
Prokuradór : Dr. Napolião Soares
Defeza : Dra. Joana Cristina Pinto
Desizaun : pena Multa US\$ 45.00

Iha 28 Dezembru 2022, Tribunál Distritál Díli prezide julgamentu leitura sentesa ba krime ofensas integridade física simples ho natureza violénsia doméstika ne'ebé envolve arguidu DFdS hasoru nia fen iha Munisípiu Díli.

Akuzasaun Prokuradór

Prokuradór akuza katak iha 09 Novembru 2021 iha oras tuku 08:00 dadeer, arguidu tebe dala rua iha lezada nia kidan, kaer lezada nia kabaas rua hodi dudu tun ba rai nosama makaas iha lezada nia hirus matan, bainhira lezada monu ba rai arguidu kontinua lori ai-pedasuk ida baku dala rua iha lezada nia liman parte loos. Arguidu niahahalok ne'e reulta lezada hetan moras iha kidan, hirus matan no liman parte loos. Lezada ba halo tratamentu iha ospital Nasionál Guido Valadares. Antes ne'e lezada ba haree nia subriña moras iha Kamea, wainhira fila ba uma arguidu hatete ba lezada dehan' *nusá ó la hela de'it iha Kamea ó fila fali mai uma halo sa'ida, nune'e lezada hatán dehan ha'u mai tanba labarik nain rua, la'os tanba ó.* Arguidu nerbozu halo kedas agresaun refere hasoru lezada.

Arguidu Domingos F. da silva komete krime ne'e ho forma libre, deliberada no konsentementu. Arguidu hatene katak nia hahalok ne'e, proibidu no punidu tuir KP kona-ba ofensas ba integridade fízika simples ne'ebé sei hetan pena prizaun tinan 3 ka multa.

Produsaun ba prova sira

Iha prosesu julgamentu, arguidu deklara katak faktu sira ne'e loos hotu no arguidu lori ain tebe dala ida iha lezada nia kidan kaer iha kaba'as dudu lezada monu ba rai, sama iha lezada nia hirus matan no hodi tan ai pedasuk ida baku iha lezada nia liman parte loos. Motivú husi akontesementu ne'etanbá lezada ba haree nia subrina moras iha Kamea no wainhira lezada fila ba uma arguidu hirus no hatete ba lezada dehan '*nuáa ó la hela de'it iha Kamea ó fila fali mai uma halo saida, nune'e lezada hatán dehan ha'u mai tanba labarik nain rua, la'os tanba ó tanba ne'e mak arguidu nerbosu no halo agresaun refere hasoru lezada no iha momentu ne'eba lezada halai sai husi uma semana hodi ba hela iha nia inan-aman no iha momentu ne'eba arguidu ba tuir husu deskulpa ba lezada ho nia inan-aman no fó sala ba lezada ninia inan aman no agora dadaun sira nain rua moris hamutuk hanesan feen-la'en*

Iha prosesu julgamentu, lezada deklara katak loos duni arguidu halo agresaun hasoru lezada, arguidu tebe dala ida iha parte kidan no ka'er iha kabaas dudu lezada monu ba rai no lezada sente moras no hala'o tratamentu iha Ospital Nasionál Guidu Valadares no agora daudaun sira rua hamutuk fali hanesan fen ho laen

Alegasaun finál

Prokurador konsidera ba prova arguidu konfesa parsialmente arguidu aplika krime ofensas integridade fízika simples artigu 145 KP ho natureza violénsia doméstika nune'e husu ba tribunál fó pena ba arguidu fulan tolu suspende ba tinan ida.

Enkuantu defeza husu ba tribunál atu konsidera arguidu konfesa integramente no nia sei la halo tan hahalok ne'e iha futuru ho nune'e husu ba tribunál atu fó pena ne'ebé mak justu no adekua ba arguidu.

Desizaun

Depoide avalia faktu sira hotu, tribunál konsidera arguidu komete duni krime hasoru lezada no konsidera faktu sira provadu hotu nune'e tribunál konklui prosesu ne'e no kondena arguidu ho pena multa durante loraun 90, kada loraun selu US\$ 0,50 sentavus ho total US\$ 45.00

14. Krime ofensa ba integridade fízika simples ho natureza violénsia doméstika

Nú. Prosesu	: 0037/22.DICMR
Kompozisaun Tribunál	: Singulár
Juis	: Dr. José Gonçalves
Prokuradór	: Dr. Luis Hernani Rangel
Defeza	: Dr Nelson Borges
Desizaun	: Pena prizaun fulan neen suspende ba tinan rua

Iha loron 28 Dezembru 2022, Tribunál Distritál Díli prezide julgamentu leitura sentensa ba krime ofensa ba integridade fízika simples ho natureza violénsia doméstika envolve arguidu JSM hasoru nia feen iha Munisípiu Díli.

Akuzasaun Prokuradór

Prokuradór akuza katak iha 10 Janeiru 2022, iha oras tuku 00:00 kalaniha Beto Díli, arguidu rakut iha lezada nia fuuk, tuku iha lezada nia kotuk laran kauza moras no halo mós lezada monu tun ba rai, arguidu kontinua tebe dala rua iha lezada nia kabaas parte loos hafoin sama tan dala ida iha lezada nia kabas, kauza moras no halo mós lezada hakilar. Arguidu, kontinua halo agresaun hasoru lezada, arguidu foti tan besi kanu ida baku tán dala ida iha lezada nia kanoruk hodi rezulta kanek ne'ebé grave. Antes ne'e arguidu fila ba uma kalan boot ho kondisaun lanu todan, nune'e lezada husu ba arguidu dehan '*tanba sá mak ó fila kalan boot, keta ó amante ho fetu seluk*'. Nune'e arguidu nerbosu no komete krime ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Arguidu konfesa integralmente ba faktu sira iha akuzasaun no deklara katak iha momentu ne'ebá arguidu lanu todan fila ba uma lezada ko'alia hasoru arguidu no hateten "*nusá fila kalan boot, ba hasoru ho fetu seluk karik?*" ho nu'une mak arguidu rakut lezada nia fuuk, tuku, sama, no foti besi kanu baku iha lezada nia kanuruk. Depoizde akontesementu arguidu husu ona deskulpa ba lezada, di'ak malu ona no arguidu arrepende nia hahalok

Aleinde ne'e, lezada mós konfirma ba faktu sira no deklara katak depoizde akontesimentu lezada ba hela iha uma mahon durante semana ida, ba halo tratamentu iha Pradet no hemu aimoruk durante loron rua.

Alegasaun finál

Prokuradór haktuir katak arguidu konfesa integralmente ba faktu no haree ba sirkunstánsia sira nune'e husu ba tribunál atu kondena arguidu ho pena multa tuir arguidu nia nesesidade.

Enkuantu parte defeza konkorda ho prokuradór nia aalegasaun atu aplika pena multa tuir arguidu nia nesesidade tanba arguidu foin primeiravés halo agresaun hasoru lezada no lezada mós konfirma katak depoizde akontesimentu sira di'ak malu ona.

Desizaun

Depoizde avalia faktu sira hotu, tribunál prova katak arguidu komete duni krime hasoru lezada, arguidu rakut lezada nia fuuk, tuku lezada nia kotuk laran, tuku dala rua iha lezada nia kabaas parte loos, sama dala ida iha lezada nia kabaas no foti besi kanu baku tán dala ida iha lezada nia kanuruk,

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu husu ona deskulpa ba lezada, sira di'ak malu fali ona no arguidu arrepende nia

hahalok nune'e tribunál konklui prosesu ne'e no kondena arguidu ho pena prizaun fulan neen suspende ba tinan rua.

15. Krime ofensa ba integridade física simples ho natureza violénsia doméstika

Nú. Prosesu : 0156/22.PDDIL
Kompozisaun Tribunál : Singulár
Juis : Dr. Ivan Patrocínio Antonino Goncalves
Prokuradór : Dr. Luis Hernani Rangel
Defeza : Dra. Jubeleia A. Dj Vidigal (Pessoa Idonia)
Desizaun : Pena multa US\$ 90.00

Iha 29 Dezembru 2022, Tribunál Distritál Díli prezide julgamentu leitura sentensa ba krime ofensa ba integridade física simples ho natureza violénsia doméstika envolve arguidu José da Castelano hasoru nia feen iha Munisípiu Díli.

Akuzasaun Prokuradór

Prokuradór akuza katak iha 26 Abril 2022 iha oras tuku 20:00 kalan arguidu tebe dala ida iha lezada nia kotuk laran halo lezada sente moras no monu kedas ba rai kauza kanek iha lezada nia ain, arguidu kontinua uza kapasete hodi baku dala ida iha lezada nia kotuk laran, hafoin dada lezada tama kuartu laran hodi kontinua tebe dala rua iha lezada nia kabun, depois tuku mós dala barak iha lezada nia ulun no kotuk laran kauza moras, lezada senti moras ho agresaun ne'e no lezada halai sees tiha husi arguidu no arguidu kontinua foti katana nia kotuk hodi baku dala ida iha lezada nia ulun kauza moras no bubu.

Antes ne'e durante semana ida nia laran arguidu ho lezada laiha komunikasaun no haree mane ida mak tula lezada. Iha momentu ne'ebá arguidu tula lezada husi Surikmas fila ba sira nia uma iha Hera, bainhira to'o iha uma, lezada foin tun husi motór leten arguidu halo kedas agresaun hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu arguidu deklara katak faktu balun loos no balu la loos, arguidu deklara katak nia basa duni dala rua no dudu halo lezada monu ba rai. Arguidu rezeita ba faktu sira seluk ne'ebé akuza ba arguidu.

Aleinde ne'e lezada konfirma ba faktu katak antes problema ne'e mosu lezada ho arguidu laiha komunikasaun ba malu ona tanba arguidu tau nia eis namorada nia foto iha *story whats up*, nune'e lezada mós decide hodi ba hela iha nia inan-aman nia uma depoisde akontesimentu ne'e, lezada ho arguidu hela separadu ona to'o agora.

Alegasaun finál

Prokuradór haktuir katak arguidu konfesa parsialmente ba faktu sira iha akuzasaun maibé lezada konfirma ba faktu sira no perante tribunál lezada decide hodi separadu ho arguidu

ho nune'e prokurador husu ba tribunál fó pena multa tuir nia nesidades tanba arguidu nu'udar estudante.

Entretantu parte defeza konkorda ho prokurador nia alegasaun atu aplika pena multa ba arguidu tuir nesidade arguidu nian tanba arguidu sei estudante no ekonomikamente sei depende ba inan-aman.

Desizaun

Depoisde avalia faktu sira hotu, tribunál prova katak arguidu basa dala rua, dudu monu lezada ba rai arguidu sei eskola iha universidade, ekonomikamente sei depende ba inan-aman no arguidu ho lezada hela separadu ona, nune'e tribunál konklui prosesu ne'e no kondena arguidu ho pena multa US\$ 90.00, kada leron selu sentavus 0.50 durante leron 120, bainhira arguidu la selu multa refere mak arguidu sei kumpre pena prizaun durante leron 60.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl